

Mas di e historia di Aruba y e Caha di orgelnan di Brazil

Mas of menos na 1900 pa dilanti caha di orgel a cuminsa drenta Aruba, mas tanto via Corsow. E prome cahanan a bini for di Italia.

Un caha por ta enkel of dobbel. E caha ta funciona mescos cu un piano. Den e caha di orgel tin un cylinder cu ta wordo gedrei cu man di e caha. E man di e caha ta drei un corona y esaki ta drei e cylinder. E cylinder di e caha dobbel tin mas of menos ocho mil clabo, esun di e enkel tin menos. Ta kita e cabes di tur e clabonan. Ora cu drei e cylinder, cada un di e clabonan ta dal riba un punta di stal cu yama huña. E huña aki, ta pega na e martiyetanan. E martiyetanan ta dal ariba e cuerdenan cu tin na e caha di orgel pa asina e saca e melodia. Antes Rufo Wever (rip) tawata pone piesa nobo. Despues Alfonso (Buchi) Boekhoudt, Fransisco (Choncho) Boekhoudt (rip) y Alejandro Farro a sigui. Un persona ta drei e man di e caha p'e por toke. Un te dos persona ta toca e wiri. Un wiri ta un instrument cu ta wordo traha di monel of stainless steel. Antes, nan tawata di koper. Cado v/d Linden (rip) tawata traha man di caha di orgel, corona y wiri. E doñonan di caha ta duna nan caha un number.

Na Brazil tawatin e siguiente cahanan:

'Colebra berde' / despues **'Cacalaca Blanco'** di sra. Juanita Gomes- Angela cu a nace na 1892, miho conoci como Juanita di Foyen. E caha aki ta data di añanan 30. Ademá di tocado di caha, Juanita tawata frumon y labado di morto;

'Victoria'/ actualmente **'Flor di Casibari'** tawata di Jan Cornelis Noguera, Cornes Noguera (rip), cu a nace na 1896 y a muri na 1999, cu 103 aña. E caha aki ta data di añanan 40. Debi cu Cornes tawata robesa, e no por a toca e caha, paso siendo robesa lo e tapa e caha completamente. E tawata toca wiri, bisti cu su sincuri. Diferente persona a toca caha pa Cornes. Entre nan Jose Winterdal (rip) y su yui mohe Isidora Winterdal. Caha di orgel Victoria a yega di presenta na: Corsow, Bonaire, Punto Fijo y Surinam;

'Dulce Amor' di Janshi Schwengle (rip);

'Aurita' di Dominico Wernet (rip);

'El Cantor' di Janshi Ridderstap(rip) ;

'Primavera' di Fransisco Lampe (rip);

'Flor del Campo' di Betto Solognier (rip).

Antes, nan tawata tene fiesta na cas. Door cu e hadrei ta chiquito y tur hende kier balia pareu, nan tawata duna e hendenan strik di tres diferente colo. Cada colo ta haya su beurt pa balia.

Awendia, tin hende ta cumpra caha di orgel pa nan pronk den nan cas of negoshi y tin cu tin mas di tres caha den nan poder.

Informacion compila pa sr. Marcelo (Buchi) Irausquin di caha di orgel 'Nos Anarosa' y elabora pa Celia O. Thiel